

Dem Erfamen Johān Grieninger Bürger vnd  
Büchtrücker zu Straßburg/  
embüwr ich Laurentius  
Frieß/ natürli//  
cher Philoso//  
phus Heyl

**G**unstiger lieber Grieninger als ir mich gepetē vor etlicher zeit die Werkarten in kleinere form (ein ictlichen züeriger/ auch in mercklichern verstand/ dan sie biß her gewesen) zü bringen/ hab ich eüwerem begerē/ vō wege lang geübter fründtschafft / mit fügen nit mögen zü wider sein / mich geflissen nach meis nem schwachen vermögen euch gürwillig allwegen zügegē zü sein/ Die gemeinen Carten in zimlicher größe nach rechter kunst vnd gewisser messung der Geometry gesetzet/ Nit das ich damit verkleinern od verminder achten wölle/ die andern/ so vormals vßgangen von dem weit berümpften Martino Waldseemüller / dem Gott der herr gnedig sey / Als mir dan die neidigen leichtlichen möchten zü messen. Aber darumb das die selbig Werkart nit yedem anmütig oder tögenlich von wegen irer vberigen lenge vnd breite/ deßhalb ir züentschuldigü in disem fall mein gezeüg seind/ wan ich keinem gelerten/ er sey gleich in leben oder abgestorben/ weder sein lob oder kunst/ beger züenweren oder zu mindern. Vff dz aber solliche mein arbeit yederman verstendig/ vnd zü nütz kome/ hab ich für mich genomen diser edlen/ nutzparen vnd auch kurzweiligen Werkarten inhalt vßzulegen/ wclchs dan auch nit mit kindischer arbeit gesein mag/ Vrsach das sie in ir begreift die gangen in dēn welt / das ist die wind/ das hohe meer/ alle läffen oder ärm des mers/ Alle namhafte erlkante Insulen/ das ingewonertreich/ lender/ künigreich/ herschafftē/ ster/ gebirg / fließende wasser/ wülnüssen/ selzame wunderbarliche ding/ nach rechter natürlicher art/ als sie dan in lenge vnd breite voneinander gelegē seind/ sampt vil lustigen dingen/ Welche alle nit dan durch vil andere edlen künsten hilff beschreiben müssen werden/ auß welchem dan reichet das solliche beschreibung auch zü mancherley hendlung dienen mag/ als dann gar lieblich bezeüget der alte Erreich beschreiber Strabo am ersten vnd andern büch. Nun wiewol mir vor geschēhen ist vil nachred von ellichen/ da ich euch vmb freuntschafft willen die weltbeschreibung Ptholomei erwas gebessert/ erstattet vñ erklert hab/ furwar ein arbeit welcher ich mich bey allen verstendigē nit bescham/ angesehen die kurtze der zeit so ich dar zü gehabt ic. Vnd damit ich gang zü vollenden dise vßlegung der offrtgedachten Carten. Gott sey eüwer beschirmer. Geben zü Straßburg vff die stund da die Sonne was im .xxj. grad vnd .xl. minuten der hoch. des Jars da man zalt. M. D. xxv.